



**Allaffeqarfilinnik Inatsisartut illorsualiunnissaannut Inatsisartoqarfiup pilersaarutaa pillugu Inatsisartunut ilaasortat akuersillutik aalajangiiffigisassaattut siunnersuut.**

(Inatsisartut Siulittaasoqarfiat)

(Siullermeenera)

Demokraatini aallarniutigalugu oqaatigissavarput, Inatsisartut Siulittaasoqarfiani sinniisuutitaqannginnatta. Taamaattumik isumassarsiamut matumunnga suleqataanikuunngilagut taamatullu aamma suliamut akuutinneqarnerput killeqarsimavoq taamaallaat uanga siulittaasutut Siulittaasoqarfimmut aggersarneqarnikuugama ilisimatinneqarnissara oqaloqataanissaralu siunertaralugit.

Tamatumunnga atatillugu suliap aningaasalersornissaa pillugu apeqquteqarpunga eqqumiimmat nutaamik illorsualiorneq pioreersumik iluarsaassinertulli akeqartussatut tagginneqarsimammat. Paasivara tamatuma kingorna Inatsisartut illorsualiunnissaat akisunerungaatsiartussanngorsimasoq pioreersumik iluarsaassinermut naleqqiullugu.

Siunnersuumminut tunngavilersuutit Siulittaasoqarfik oqarpoq nutaamik illorsualiornissamut kikkut tamarmik isumaqataasimasut. Siulittaasoqarfiup taamatut inerniliisimanini nammineq akisussaaffigissavaa. Demokraatilli sinnerlugit oqaatigisariaqarpara uangut isumaqataanngilluinnaratta.

Suliaq uatsinnut saqqummiunneqarmat oqaatigineqarpoq illorsuarmik nutaamik sanaartornermut 95 mio. koruunit aningaasartuutigineqassasut. Tassunga atatillugu aamma oqaatigineqarpoq Naalackersuisut suleqatigisiititaliaata taggissimagaa sukumiisumik illorsuarmik pioreersumik iluarsaassineq 90 mio. Tassani paasinarpoq iluarnerussasoq nutaamik illorsualiortoqarpat.

Inatsisartut Siulittaasuannik ataatsimeeqateqarninni oqaatigaara qularalugu illorsualiorneq 95 mio. koruuninik akeqarsinnaanissaa, Nuummi allaffissuaq quleriaaq akisunerunikummat. Aali nunagissaaneq ilanngunnagu.

Aamma erserpoq illorsualiornissaq 200 millioner koruunit missaanni akeqarnissaa ilimanarnerusoq 100 millioner koruuneqarani. Aamma maannakkut kialluunniit ilisimanngilaa sanaartorneq suli akisunerussanersoq. Siulittaasoqarfiup takorloorpaa sanaartortoqassasoq taarsigassarsinikkut, tassa imaappoq ukiuni tulliuuttuni 30-nik attartornermut akiliutissat 300 millioner koruuninik amerlanerusut illuartittariaqassapput.



Demokraatini Siulittaasoqarfimmik ataatsimeeqateqarnitta siulliup kingorna aalajangerpugut apeqqutitta akineqarnissaat utaqeqqaarniarlugu tamatuma kingorna nalilerusukkatsigu aningaasatigut akilersinnaassanersoq aamma inuiaqatigiit pisariaqartitaannut sanaartugassaq naapertuunnersoq.

Atagu paatsuugassaannngitsumik naqissuserlara: Imminut akilersinnaanngilaq aamma inuiaqatigiit pisariaqartitaannut naleqqiullugu ingasattajaarpallaaqaaq.

Demokraatini isumaqarpugut, aningaasat taakku allanut pitsaanerujussuarmik atorneqarsinnaasut. Eqqunngitsutut isigaarput aningaasat taama amerlatigisut Inatsisartunut atorneqassappata peqataanik isiginiannuarlugu atuartut atuarfinni aserfallassimaqisuni peqqinnanngitsunilu atuartinneqartartut. Eqqunngitsutut isigaarput aningaasat taama amerlatigisut Inatsisartunut atorneqassappata peqataanik isiginiannuarlugit inuit angerlarsimaffimmik oqussimanerat pissutigalugu atungarliortut, angerlarsimaffiisa iluusaannissaannut akissaqartoqanngimmat. Aamma sualummik kukkunertut isigaarput politikerit aammaarlutik imminnut pavungarsuaq inisseqqinniarmata innuttaasunut naleqqiullutik.

Nassuerutigissavarpulli maannakkut Inatsisartut ataatsimiittarfiat mikivallaaluatsiarmat. Tassunga atatillugu eqqaasitsissutigissavarput Demokraatini siunnersuutiginikuugatsigu ajornartorsutitip aaqqiiviginissaa oqarluta Inatsisartuni ilaasortat ikilisinneqarsinnaasut, qinersinerup tulliata kingorna 25-iinnagortillugit, ullumikkutut 31-iujunnaarsillugit. Pisortat partiinut tapiissuteqartarnerannut, politikerit akissarsiaannut tamanna sipaaruteqartitsissaaq minnerunngitsumillu Inatsisartut ataatsimiittarfianni ilaasortat tattoqilliuunnerat aamma aaqqiivigineqassaaq.

Naatsorsuutigisatsinnut akerliusumik Inatsisartuni amerlanerussuteqartut pingaarnertissappassuk innuttaasunit qaffasinnerunissartik innersuussutigissavarput, naalagaaffiup suliffeqarfiutai pilersaarummut ilaatinneqassasut. Tamatuma eqqarsaatingaakka Kalaallit Nunaanni politiit aamma Naalagaaffiup sinniisoqarfia. Illorsuup pioreersup iluatsup ilaa isateriarlugu ilaannaa napatinneqarpat kusanarsinnaanngilaq. Taamaattumik naalagaaffiup suliffeqarfiutaanut attaveqarnissaq pitsaassagaluqaq.

Naggataatigut oqaatigilara kissaatiginaraluaqimmat aningaasaqarniarnitta pitsaanerunissaa. Taamaassimagaluarpat kissaatigut amerlanerit piviusunngortissinnaassagaluarpagut. Atuarfiit iluusaassinnaassagaluarpagut, angerlarsimaffiit aamma Inatsisartut Ataatsimiittarfiliuussimassagaluarpagut peqataanik. Piviusorli puigussarinngisarput tassaavoq, pingaarnersiuisariaqaratta. Demokraatinilu pingaarnertippagut meeqqat atuarfiini atuartut, ilinniartitsisut aamma inuinnaat angerlarsimaffiit politikerinut naleqqiullugit.



Taamaattumik aamma puigornagu inuppassuit ulluinnarni pisortat suliffiutaanni sulimmata sullivinni avatangiisiluttuni aamma silaannalulluinnuqqissaartuni. Taakku pingaarnuteriartigit politikerit kusanartorsuarmik sanaartorusunnerat salliutinnagu.

Tamanna tunngavigalugu siunnersuut itigartipparput.